

CUSSEGL GROND

Sessiun d'october 2023

Incumbensa da la fracziun da la PPS concernent la promoziun da datas administrativas avertas (emprim sutsegnader Koch)

En la debatta davart la missiva per il relasch d'ina lescha davart l'administraziun digitala, che ha gi lieu durant la sessiun d'october 2023, èsi sa mussà, ch'il Cussegl grond è da princip da l'opiniun, che datas sajan in bain fitg impurtant entaifer ed ordaifer l'administraziun. Senza dubi ha il chantun Grischun in grond basegn d'agir en tut ils regards da la digitalisaziun. Cun il conclus davart l'art. 6 al. 1 vegn il chantun a stuaire sa concentrar en l'avegnir pli fitg sin la publicaziun da datas administrativas avertas (open government data, OGD). L'access avert a datas ed a savida dat l'impuls per novas ideas e pussibilitescha l'innovaziun. La publicaziun generala da datas (trasparenza) porta ultra da quai ina circulaziun pli svelta da las infurmaziuns sco er in barat en e tranter regenzas, organisaziuns ed autras instituziuns. Ultra da quai vegn meglierada lur collavuraziun. Las datas pon vegnir consultadas ed examinadas da mintgina e mintgin en moda independenta. Quai po gidar supplementarmain a scuvrir pli facilmain infurmaziuns sbagliadas ed a curreger talas. Cun integrar terzs po uschia vegnir augmentada la qualidad da las datas dal chantun (augment da la qualidad).

Datas administrativas avertas pon survegnir ina gronda impurtanza per l'economia publica. Perquai duai la Regenza avair la pussaivladad da promover cun contribuziuns la preparaziun, la preschentaziun e l'utilisaziun dad OGD. Questa mesira duai vegnir chapida en il context da la perscrutaziun e da l'innovaziun e duai cumpletter las contribuziuns tenor la Lescha davart la promoziun da la transfurmaziun digitala en il Grischun.

Las sutsegnadras ed ils sutsegnaders incumbenseschan perquai la Regenza da stgaffir la basa, per ch'il chantun possia promover cun contribuziuns la preparaziun da datas e l'utilisaziun dad OGD tras terzs.

Cuira, ils 18 d'october 2023

Koch, Gort, Grass, Adank, Brandenburger-Caderas, Candrian, Casutt, Cortesi, Della Cà, Favre Accola, Krättli, Menghini-Inauen, Metzger, Rauch, Roffler, Salis, Sgier, Städler, Stocker, Weber